

नमो नमो निम्मलदंसणस्स

पू. आनंद-क्षमा-ललित-सुशील-सुधर्मसागर गुरुभ्यो नमः

२०

कप्पवडिंसियाणं-नवमं उवंगसुत्तं

मुनि दीपरत्नसागर

Date : / / 2012

Jain Aagam Online Series-20

२०

गंथाणुककमो

कमंको	अज्झयणं	सुत्तं	गाहा	अणुक्कमो	पिड्डंको
१	पढमं-पउमे	१-	-	१-	२
२	बीअं-महापउमे	२.१-	-	२-	३
३-१०	तइयं (जाव) दसमं	२-	१-	३-५	३

२० कप्पवडिंसियाणं-नवमं उवंगसुत्तं

० पढमं अज्झयणं-पउमं ०

[१] जइ णं भंते! समणेणं भगवया महावीरेणं जाव संपत्तेणं उवंगाणं पढमस्स वग्गस्स निरयावलियाणं अयमद्वे पन्नत्ते दोच्चस्स णं भंते! वग्गस्स कप्पवडिंसियाणं समणेणं भगवया महावीरेणं जाव संपत्तेणं कइ अज्झयणा पन्नत्ता ?, एवं खलु जंबू! समणेणं भगवया महावीरेणं जाव संपत्तेणं कप्पवडिंसियाणं दस अज्झयणा पन्नत्ता तं जहा- पउमे महापउमे भद्वे सुभद्वे पउमभद्वे पउमसेने पउमगुम्मे नलिनिगुम्मे आनंदे नंदने ।

जइ णं भंते! समणेणं भगवया महावीरेणं जाव संपत्तेणं कप्पवडिंसियाणं दस अज्झयणा पन्नत्ता पढमस्स णं भंते! अज्झयणस्स कप्पवडिंसियाणं समणेणं भगवया महावीरेणं जाव संपत्तेणं के अद्वे पन्नत्ते ? एवं खलु जंबू! तेणं कालेणं तेणं समएणं चंपा नामं नयरी होत्था, पुन्नभद्वे चेइए, कूणिए राया, पउमावई देवी, तत्थ णं चंपाए नयरीए सेणियस्स रण्णो भज्जा कूणियस्स रण्णो चुल्लमाउया काली नामं देवी होत्था-सूमाला० तीसे णं कालीए देवीए पुत्ते काले नामं कुमारो होत्था-सूमाले ।

तस्स णं कालस्स कुमारस्स पउमावई नामं देवी होत्था-सूमाला पाणिपाया जाव विहरइ । तए णं सा पउमावई देवी अन्नया कयाई तंसि तारिसगंसि वासघरंसि अब्भितरओ सचित्तकम्मे जाव सीहं सुमिणे पासित्ताणं पडिबुद्धा, एवं जम्मणं जहा महाबलस्स जाव नामधेज्जं, जम्हा णं अम्हं इमे दारए कालस्स कुमारस्स पुत्ते पउमावईए देवीए अत्तए तं होउ णं अम्हं इमस्स दारगस्स नामधेज्जं पउमे-पउमे, त्ति सेसं जहा महाबलस्स अद्वओ दाओ जाव उप्पिं पासायवरगए विहरइ, सामी समोसरिए, परिसा निग्गया, कूणिए निग्गए, पउमेवि जहा महबले निग्गए तहेव अम्मापिइ आपुच्छणा जाव पव्वइए अनगारे जाए जाव गुत्तबंभयारी ।

तए णं से पउमे अनगारे समणस्स भगवओ महावीरस्स तहारूवाणं थेराणं अंतिए सामाइयमाइयाइं इक्कारस अंगाइं अहिज्जइ अहिज्जित्ता बहूहिं चउत्थ छट्ठम- [दसम-दुवालसेहिं मासद्ध-मासखमणेहिं विचित्तेहिं तवोकम्मेहिं अप्पाणं भावेमाणे] विहरइ ।

तए णं से पउमे अनगारे तेणं ओरालेणं जहा मेहो तहेव धम्मजागरिया चिंता एवं जहेव मेहो तहेव समणं भगवं महावीरं आपुच्छित्ता विउले जाव पाओवगए समाणे तहारूवाणं थेराणं अंतिए सामाइयमाइयाइं एक्कारस अंगाइं अहिज्जित्ता, बहुपडिपुन्नाइं पंच वासाइं सामण्णपरियागं पाउणित्ता, मासियाए संलेहणाए अप्पाणं झोसेत्ता, सट्ठिं भत्ताइं अनसनाए छेदित्ता आनुपुव्वीए कालगए, थेरा ओइण्णा ।

भगवं गोयमे पुच्छइ, सामी कहेइ, जाव सट्ठिं भत्ताइं अनसनाए छेदित्ता आलोइय-पडिक्क-मंते उड्ढं चंदिम-सूर-गहगण-नक्खत्त-तारा-रूवाणं० सोहम्मे कप्पे देवत्ताए उववन्ने दो सागराइं ठिई ।

से णं भंते! पउमे देवे ताओ देवलोगाओ आउक्खएणं पुच्छा, गोयमा! महाविदेहे वासे जहा

दढपइण्णो जाव अंतं काहिइ, तं एवं खलु जंबू! समणेणं भगवया महावीरेणं जाव संपत्तेणं कप्पवडिंसियाणं पढमस्स अज्झयणस्स अयमढ्ठे पन्नत्ते त्तिबेमि ।

◦ पढमं अज्झयणं समत्तं ◦

◦ बीअं अज्झयणं-महापउमं ◦

[२] जइ णं भंते! समणेणं भगवया महावीरेणं जाव संपत्तेणं कप्पवडिंसियाणं पढमस्स अज्झयणस्स अयमढ्ठे पन्नत्ते, दोच्चस्स णं भंते! अज्झयणस्स कप्पवडिंसियाणं समणेणं भगवया महावीरेणं जाव संपत्तेणं के अढ्ठे पन्नत्ते ?

एवं खलु जंबू तेणं कालेणं तेणं समएणं चंपा नामं नयरी होत्था, पुन्नभद्दे चेइए, कूणिए राया, पउमावई देवी, तत्थ णं चंपाए नयरीए सेणियस्स रण्णो भज्जा कूणियस्स रण्णो चुल्लमाउया सुकाली नामं देवी होत्था, तीसे णं सुकालीए पुत्ते सुकाले नामं कुमारे, तस्स णं सुकालस्स कुमारस्स महापउमा नामं देवी होत्था-सूमाला० तए णं सा महापउमा देवी अन्नया कयाइं तंसि तारिसगंसि एवं तहेव महापउमे नामं दारए जाव सिज्झिहिइ, नवरं ईसाने कप्पे उववाओ उक्कोसडिइओ, तं एवं खलु जंबू समणेणं भगवया महावीरेणं जाव संपत्तेणं कप्पवडिंसियाणं दोच्चस्स अज्झयणस्स अयमढ्ठे पन्नत्ते । त्ति बेमि ।

० ३-१०-अज्झयणाणि ०

[३] एवं सेसावि अढ्ठ नेयव्वा, मायाओ सरिसनामाओ कालाईणं दसण्हं पुत्ताणं आनुपुव्वीए ।

[४] दोण्हं च पंच चत्तारि तिण्हं तिण्हं च होंति तिन्नेव ।

दोण्हं च दोण्णि वासा सेणियनत्तूणं परियाओ ॥

[५] उववाओ आनुपुव्वीए-पढमो सोहम्मो बिइओ ईसाने तइओ सणंकुमारे चउत्थो माहिंदे पंचमो बंभलोए छट्ठो लंतए सत्तमो महासुक्के अढ्ठमो सहस्सारे नवमो पाणए दसमो अच्चुए सव्वत्थ उक्कोसडिइ भाणियव्वा, महाविदेहे सिज्झिहिंति ।

० ३-१०-अज्जयणाणि समत्तानि ०

मुनि दीपरत्नसागरेण संशोधिताः सम्पादिताश्च “कप्पवडिंसियाणं” उवंगं सम्मत्तं

२०

कप्पवडिंसियाणं-नवमं उवंगं सम्मत्तं